

Шомга сафарлари ва роҳиб Буҳайронинг башорати



15:53 / 30.11.2017 4653

137

Буюк ишлар кутарди, кўп башорат бўлганди,
Ўшал вақти ушбу Зот , ўн иккига тўлганди,
Ташлаб кетса сафардан, ранглари ҳам сўлганди,
Ўсмирликдан қадрини, билдириб қўйди АЛЛОҲ.

138

Абу Толиб бош бўлиб қиларди, шомга сафар,

Бул сафардан набира, топганди тонгда хабар,
Қол деб бобоси айтар, етмасин сенга хатар,
Шомга сафар қилмоқни, битиб қўйганди АЛЛОҲ.

139

Ёш набира йиғларди, юрак эзар аҳволда,
-Эй бобожон! Мен ёлғиз, ташлаб кетманг бу ҳолда,
Қалбим қаро кетсангиз, қолмайин аро йўлда,
Боболарин қалбига , меҳр солганди АЛЛОҲ.

140

-Укамдан мерос болам, кетмасман сени ташлаб,
Юрак бағрим эзмагин,қўймасман қалбинг ғашлаб,
Ўзим бошман карвонга, борарман Шомга бошлаб,
Бул сафарни Азалдан, башорат қилган АЛЛОҲ.

141

Карвон йўлга чиқганда, ажиб холат бўлганди,
Сарбон сезмас бу холни, лек Бухайро билганди,
Насронийдан бу роҳиб, узоқлардан кўрганди,
Бу хабарни Инжилда,айтиб қўйганди АЛЛОҲ.

142

Карвон келар узоқдан , Бусро томон оҳиста,
Бу кунни кутар кўпдан, диллари бўлиб ҳаста,
Роҳиб қарабуларни, таниболди бир пасда,
Карвон узра булутни, суздириб қўйди АЛЛОҲ.

143

Илгари ҳам кўп ўтган, ушбу йўлдан араблар,
Бу карвонни улуғлаб, Буҳайро ҳам шарафлар,
Вақти келди нур чиқди, нурли Макка тарафлар,
Сақлай деса балодан , сабаб берарди АЛЛОҲ.

144

Карвон ўтар илгари, асло қўймасди боқиб,
Фурсат келди кутарди, кўзларга ҳижрон ёқиб,
Ушбу сафар келганда, пешвоз чиқдику роҳиб,
Бу роҳибни шу жойда, ушлаб турганди АЛЛОҲ.

145

Маккадан келган шайхлар, билмасди кимга хамроҳ,
Ғайбдан йўқда хабари, билганда бўлмас гумроҳ,
Яҳудларнинг олими, роҳибдек эмас, шумроҳ,
Ҳар бир ишни қилмоқни , ирода қилган АЛЛОҲ.

146

Карвон келиб сояга, битта-битта жойланди,
Инжилда айтган сифат, кўриб роса ўйланди,
Роҳибкўнгли охири, ёш болага бойланди,
Мухри Нубувват ила, билдириб қўйди АЛЛОҲ.

147

Роҳиб ўтар саралаб, одамларни оралаб,
Роҳман элчисин излаб, сифатларни қоралаб,
Дийдор вақти келгунча, дилни қилди поралаб,
Ҳар бир ишни вақтида, шошмай қиларди АЛЛОҲ.

148

Кечиб барча роҳатдан, маскан қиб чўлларида,
Роҳиб ўқиб Инжилни, кўз узмас йўлларида,
Келиб тутди соғиниб, Муборак қўлларида,
Бу роҳибни Исломга, қалқон қилганди АЛЛОҲ.

149

Бу оламнинг саййиди, номлари бўлса Аҳмад,
Бу Роҳманнинг Росули, ёғдирар ерга раҳмат,
Тезроқ қайтинг Маккага, етмасин сизга заҳмат,
Бухайронинг тилидан, ҳукм чиқарган АЛЛОҲ.

150

Маккадан келган шайхлар , бу сўзга хайрон бўлиб,
Роҳибдан изоҳ сўрар, дилга ҳаяжон тўлиб,
-Қайдан биларсан буни, ўзинг бир чўлда туриб,
Улар билмас роҳибга, илҳом берарди АЛЛОҲ.

151

-Мен кузатдим сизларни, келдингиз давон ошиб,
Тошу дарахт таъзимни, қиларди сизга шошиб,
Зиёд бўлди кўрганда, иймоним қалбга тошиб,
Тафаккур қилсанг тақвонг, зиёд қиларди АЛЛОҲ.

152

Барча сифат мукамал, Инжилда бор ишорат,
Гапларим эртак эмас, Рухуллоҳдан башорат,
Фақат инсонлар эмас, оламда бор ҳашорат,

Жами махлуқ лаҳзада, Хукмида ушлар АЛЛОҲ.

153

Ёлвораман сизларга, бормангиз Рум тамонга,
Асранг ушбу йигитни , йўлиқмасин ёмонга,
Зиён бермай авайланг, келажакда замонга,
Соғ-саломат ўсмоқга, кафил бўлганди АЛЛОҲ.

154

Тангрим гувоҳ гапим рост, яҳудийлар айнийди,
Кўрган захот бул Зотни, сифатлардан танийди,
Ҳасад қилиб ўлдирар, бормасангиз қанийди,
Чин юракдан даъватга, далда бўларди АЛЛОҲ.

155

Рум тамондан келарди, етти киши ўшал вақт,
Пешвоз чиқди уларга, роҳиб ўзи қилиб жаҳд,
Нийятларин билай мен, яхши бўлса олай аҳд,
Яхши Зотни ёмонга, хор қилиб қўймас АЛЛОҲ.

156

-Йўл бўлсин эй йигитлар, бизда қандай хожат бор,
Яхши меҳмон бўлсангиз, бизда сизга роҳат бор,
Нийятлар бўлса эгри , бизга Ҳақдан ножат бор,
Душман юз макр қилса, тадбир қиларди АЛЛОҲ.

157

-Анав Набий қиларкан, бу ойда Шомга сафар,
Сизга бир карвон келди, етганди бизга хабар,

Бизлар уни ўлдирсак, бўларди катта зафар,
Қалби кўрга дунёни, жаннат қилганди АЛЛОҲ.

158

-Биларман сизлар ишчи, нодонни қўл остида,
Сизлар излаб келган Зот, Парвардигор дўстида,
Бу кунгача соғ омон, нуқсон етмай ўстида,
Ким ҳам зиён берарди, назорат қилса АЛЛОҲ.

159

Роҳибни бу сўзлари, аскарларни лол қилди,
Кўнгли юмшаб даъватга, хато қилганин билди,
Яширмоқга бу сирни, роҳибга байъат қилди,
Бу ишларни бўлмоқни, ирода қилган АЛЛОҲ.

160

Тангрим ўнглаб ҳар сафар, ишларнинг бароридан,
Қуройш аҳли ишонди, роҳибнинг қароридан,
Эгам огоҳ замоннинг, барча сир асроридан,
Шундай қилиб сафардан, ортга қайтарди АЛЛОҲ.

161

Сўнги тадбирин қаранг, хотимаси гўзалдир,
Душманларга хор қилмас, бу тақдири Азалдир,
Умид ёзган бу сийрат, қалбдан чиққан ғазалдир,
Навмид бўлмас Умид ҳам, шафоатин бер АЛЛОҲ.

Жомеъ масжиди, имом ноиби

Ҳалилов Умиджон Абдуҳаким хожи ўғли